



Marta Riedi-Cavegn
1919-2005

bb-La Marta Riedi ei stada onris ora nossa vischina, mo saver s'entupar cun ella, gliez era mo casual e buca da quei da mintga di. Daco vegn in carstgaun aschi sulets e dapersei? Igl ei bein nies damintgadi che fuorma nus, l'educaziun, il contuorn, la lavur e buca il pli davos nos concarstgauns cun ils quals nus vivin e caminein in tschancun da nossa veta. Da giudicar suenter daco in carstgaun ei auters che nus ei spert fatg cun duvrar dil curios ni auters plaids.

La Marta ei naschida a Rueras, en casa dado baselgia. Siu bab, il Duri Vigeli era in pur tras a tras, cun ina truscha sco mo ils capos purs da lura havevan. El haveva maridau Maria Marta Monn da Sedrun ed enteifer 14 onns han els giu 12 affons. 6 buobas e sis buobs. Aunc oz seregordan enquelin dalla Iuschezia ch'il Duri Vigeli haveva da sia famiglia. La Marta ei stada la tiarza dalla famiglia. Sco en tuttas famiglias da lura ha la lavur buca muncau. Strusch saver star sin peis haveva ei num segidar. Ils buobs en nuegl e sil prau e las buobas en casa e sil prau. Quei era aschia e basta, e luvrau ed urau vegneva ei tenor il proverbi: Ura e lavura, Dieus Tei gida lura. Sche la forza d'in ni l'auter tunscheva buca da viver quella moda vegnev'ei buca dumandau, ei era silpli la veglia da Diu.

Suenter las scolas dil vitg ei la Marta serendida per in temps egl jester. Per ina er'eit la damonda da fadigia, emprender autres lavurs ed era per saver emprender empau il lungat tudestg. Suenter eis ella turnada a Rueras e restada a Rueras. Cheu eis ella segidada savens cun autres famiglias el tener casa, en special leu nua ch'eit deva glieud malsauna ni era tier naschientschas.

Igl onn 1948 ha ella maridau Gion Battesta Riedi da Rueras che habitava treis casas pli engiu. Els dus ein secasai enasisum il vitg da Rueras, pli tard oragiudem il vitg avon che sez baghegiar casa orasism. Cheu en casa nova ein els secasai viers igl onn 1957. Enteifer quels onns era la famiglia carschida, 7 affons han giu aviert lur egl e mirau en fatscha al sulegl. Quei ha pretendiu lavur e fadigia. Els havevan negin puresser, il Gion Battesta ei staus sia veta ora luvrer e signun. Varga 30 stads ei la

Marta stada persula a casa. Dasperas trer si ils affons e segidar cun siu frar Duri Vigeli che fageva il pur. Ella e siu um han mussau a lur affons co luvrar e tgei lavur ei. Da tuts han els giu quita e possibilta a tuts in mistregn. Haver uorden ed esser schubers era per els dus moda da viver. Stregn eran els vegni educai e strenggadad han els dau vinavon. Pér cul temps cura ch'ils affons ein stai carschi han era els stuiu acceptar ch'il mund serocla ed era la moda da viver semida.

Las fridas han buca muncau alla famiglia Riedi. En special la mort prematura dil fegl Vigeli ha spossau fetg la Marta. Ella ei setratga anavos ed ei sezuppada dalla glieud. Tgei forza, tgei mal, tgei panzieris vegnan ad haver smaccau ella. L'oraziun, il leger bia, far caltschiel e la truscha da mintga di cun sia ulteriura famiglia vegnan ad haver gidau ella. Ruasseivel eis ei vegniu entuorn casa.

Igl onn 1998 han els aunc astgau festivar nozzas d'aur. Denton era siu um vegnius malsauns, emblidava tut e dapertut ed in accident ha sfurzau el da serender el spital e da leu en casa da vegls a Sedrun nua ch'el ei morts la stad 2002. La Marta ei sedecidida da star vinavon a Rueras, persula e sereratga. Far il tener casa, leger vinvon mintga di tuttas gasettas ch'ella pudeva tier e far plunas caltschiel. Cun agid da siu fegl Norbert ha ella dau aschia il damogn aunc da quei da dus onns. Igl atun 2002 sto era ella serender el spital e suenter secasar en casa s. Giusep a Cumpadiels. Cheu ha ella, ch'era privada dalla udida, anflau in cauld ravugl. Ella ei immediat sesentida bein ed era saviu guder il vegnir puppergnada.

Il prender cumiau fa adina mal e caschuna tristezia, mo nus astgein era dir ch'ei fa era bein da saver ch'il pitir ha finalmein priu sia fin. Morta ei ina persuna pér cura che nus havein emblidau ella, perqueilein sereguardar en pietad ed en carezia dalla Marta,lein giavischar ch'ella seigi vegnida retschevida dalla raspada celestiala, las portas seigien stada aviartas ed ella hagi anflau tut quei ch'ella ha sperau cun crer e cun rugar.